

**Kempen Bulan Semakan Daftar Pemilih Mulai 1 Hingga 30 Jun
Bernama
30 Mei, 2012**

PUTRAJAYA, 30 Mei (Bernama) -- Suruhanjaya Pilihan Raya (SPR) akan mengadakan Kempen Bulan Semakan Daftar Pemilih 2012 mulai bulan depan bagi membolehkan 12,658,803 pemilih yang mendaftar sehingga 31 Dis 2011 membuat semakan.

Pengerusi SPR Tan Sri Abdul Aziz Mohd Yusof berkata kempen bermula 1 hingga 30 Jun itu bertujuan meningkatkan kesedaran betapa pentingnya pemilih menyemak status masing-masing sebelum Pilihan Raya Umum (PRU) Ke-13.

"Kempen itu akan memberi lebih banyak ruang kepada pemilih membuat semakan dan mengemaskini maklumat pendaftaran masing-masing jika terdapat sebarang kesilapan dan ketidaktepatan," katanya dalam kenyataan di sini Rabu.

Beliau berkata kempen itu juga sebahagian usaha SPR dengan bantuan Jabatan Pendaftaran Negara (JPN) untuk membersihkan lagi Daftar Pemilih dan kerjasama pemilih amat diperlukan bagi memastikan segala maklumat pendaftaran mereka tepat dan betul.

"Hanya pemilih yang boleh memohon menukar butir-butir mengenai diri masing-masing yang terdapat dalam Daftar Pemilih. SPR tidak dapat membetulkan apa-apa kesilapan yang berlaku tanpa pemilih itu sendiri yang memaklukkannya kepada SPR mengikut peraturan dan prosedur yang ditetapkan," katanya.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=669802>